

增修
補註
正續歷代通鑑輯覽

五十六

清

聖祖仁皇帝

〔庚戌〕康熙九年春正月以宋儒程氏後裔程宗昌程延祀襲五經博士職命各省廢藩更名地內自置田土與民田一例輸糧免其納租 初直隸各省廢藩田產免其易價改入民戶名爲更名地內有廢藩白置之地給民佃種者輸糧之外又納租銀重徵爲累戶部以久載全書不當蠲免得旨更名地內自置田土百姓既納正賦又徵租銀實爲重累著與民田一例輸糧免其納租至易價銀兩有徵收在庫者許抵次年正賦

二月以金光祖爲廣東廣西總督馬雄鎮爲廣西巡撫

免桃源等縣六年七年被水漕糧 漕糧例不蠲免以江寧巡撫馬祐奏桃源縣等處連年水災得旨蠲免康熙六七兩年分未完漕米一萬六千六百四十石後不爲例

復設山東提督

諭自十月至正月及六月停遣流徙罪人 向例流徙尙陽堡寧古塔罪人

於六月十二月停遣餘月皆令發往帝以十月至正月俱嚴寒之候罪人貧者殊多凍斃可憫諭刑部自今流徙尙陽堡寧古塔罪人自十月至正月及六月俱勿遣

授福建隨征總兵官一等精奇尼哈番王之鼎爲三等伯以克取銅山金門功也

定服制 民公以下有頂帶官員以上禁止穿五爪三爪蟒段滿翠段圓補服黑狐皮黃色秋香色衣軍民人等禁止穿蟒段緹段金花段貂皮狍獺獬白豹皮純子等服

閏二月致仕內國史院大學士金之俊卒諡文通 之俊在明官兵部侍郎闖賊入京師不能死被拷掠清兵至之俊降以原官起用頗以建白聞三月復設四川湖廣總督一福建總督一

令設法招墾江南壽州衛田地 壽州衛自順治六年大水衛軍死徙日也荒蕪至是諭戶部令漕臣設法招墾

畫一滿漢官員品級 議政王等遵旨議覆滿州大學士尙書左都御史俱

係一品侍郎學士副都御史通政使大理寺卿俱係二品漢大學士原係

正五品今爲二品尙書左都御史俱係二品侍郎學士副都御史通政使
大理寺卿俱係三品滿州郎中係三品員外郎係四品漢郎中係正五品
員外郎係從五品今若將漢人官員品級與滿州畫一則在外升調品級
不符查順治十五年曾將滿州官員品級與漢人畫一後康熙六年將滿
州官員品級改爲照舊今應行畫一將滿州官員品級照順治十五年之
例其見在品級仍准存留以後照此補授從之

夏四月復設江南蘇松常道分巡鳳廬道分巡徽寧道改淮海道爲淮揚道
復設福建分守興泉道分巡延建邵道以福州府福寧州海防事歸驛鹽道
兼管興泉二府海防事歸興泉道兼管

以蔡毓榮爲四川湖廣總督

吏部請以直隸順天府屬錢穀刑名分歸守巡二道管理從之

禁止百姓保留降調官員 從御史徐旭齡奏也

簡親王德塞薨諡曰慧

命工部通行直隸各省各官收瘞齒豁

以袁懋功爲山東巡撫

會修

卷一百二十一 青聖祖二皇帝

二

河決歸仁隄 淮揚等處因歸仁隄決田地被淹災民流離命督撫設法賑濟

五月以花善爲甘肅巡撫

六月西洋國王阿豐肅遣使瑪訥撒爾達聶等進貢 得旨西洋國地居極遠初次進貢著從優賞賚

秋七月復設太僕寺漢正卿一滿少卿一 以兵部所掌大庫場種馬場歸本寺管理

八月以董國興爲湖廣巡撫

命改內三院爲內閣 大學士學士官銜及設立翰林院衙門等官俱援順治十五年例

丁酉帝奉太皇太后皇太后謁孝陵壬子還京師

選取官學生交欽天監分科學習 諭禮部天文關繫重大必選擇得人令其專心學習方能通曉精微尋禮部議于官學內每旗選取十名交欽天監分科學習有精通者俟滿漢博士缺出補用從之

以簡慧親王德塞弟襲簡親王

設雲南永昌守道

嚴禁內外官員餽遺

冬十月以圖海巴泰爲中和殿大學士兼禮部尙書索額圖李蔚爲保和殿大學士兼戶部尙書杜立德爲保和殿大學士兼禮部尙書對喀納爲文華殿大學士管刑部尙書事

十一月定總督巡撫俸例 戶部奏嗣後總督巡撫自一品二品官推授者仍照原品支俸自三品以下官推授者俱支三品俸永著爲例從之

定刑部限內監斃處分例

蠲免江南高郵清州，今爲縣，屬淮揚道。等十五州縣水災漕糧

特頒訓諭十六條 曰敦孝弟以重人倫篤宗族以昭雍穆和鄉黨以息爭訟重農桑以足衣食尙節儉以惜財用隆學校以端士習黜異端以崇正學講法律以儆愚頑明禮讓以厚風俗務本業以定民志訓子弟以禁非爲息誣告以全良善誠窩逃以免株連完錢糧以省催科聯保甲以弭盜賊解讐忿以重身命共十六條

改內祕書院大學士魏裔介爲保和殿大學士兼禮部尙書

十二月設翰林院滿漢侍讀學士各三侍講學士各三侍讀各三侍講各三
典簿孔目各一待詔各二習滿字漢字筆帖式各十六

〔辛亥〕十年春正月賑濟蘇尼特及四子部落 蘇尼特及四子部落地方

青草不生又兼雪大牛羊倒斃殆盡差戶部理藩院官各一員動支宣府
歸化城倉粟賑濟

靖南王耿繼茂以舊疾增劇請令伊子耿精忠暫管軍務許之

冊封常寧爲和碩恭親王 常寧世祖第五子也

以羅多爲山陝總督

罷各院及各省將軍衙門通事 以各滿州官員已諳漢語也

大學士魏裔介以病乞休命回籍調理

以曹申吉爲貴州巡撫

大學士等奏品級考告成命刊刻遵行

二月以王光裕爲河道總督

以馮溥字孔博山東益都人爲文華殿大學士

三月置日講官

夏四月安南國人阮福祿來投以其獲罪伊國仍交還之 雲南貴州總督

甘文焜奏安南國人阮福祿因獲罪伊國求投內地查安南爲本朝屬國阮福祿既係有罪不便收留仍應交還安南處置從之

賑濟准揚饑民 戶部遵旨議覆准揚饑民應發銀六萬兩賑濟得旨饑民待食甚迫與銀無益著截留漕糧六萬石併各倉米四萬石遣侍郎田逢吉並賢能司官二員會同該督撫散給

命不設總督提督各省副將以下各武官令巡撫兼轄 御史徐越奏各省巡撫應飭兼管軍務得旨各省巡撫不必概令管兵其不設總督提督各省分副將以下各武官令巡撫兼轄

雲南巡撫李天浴奏請終養允之

五月靖南王耿繼茂薨諡忠敏

以朱國治

漢軍正旗人

爲雲南巡撫

命以後官員得罪鎖禁鎖拏著永行停止 戶科給事中姚文然奏江南百

姓羣集鼓廳保留總督麻勒吉且云麻勒吉自被鎖拏顏黑面削腰項拳曲聞之惻然竊思官列大僚免冠帶鎖愧辱難堪乞特降恩綸寬其鎖拏

至于所犯事情。審有實據。自有應得之罪。則朝廷一定之法。與皇上格外之恩。並行不悖矣。得旨。稱是。以後官員得罪。鎖禁鎖拏。著永行停止。麻勒吉因

京口將軍李顯貴。鎮江府知府劉元輔。通同折給兵丁草料。浮算帑銀。麻勒吉身任總督。與巡撫馬祐。不早行題參。各降二級。顯貴元輔俱處決。

六月。以靳輔字陽人為安徽巡撫。

改罰銀處分為罰俸。王以下及文武官。有應得之罪處分者。各量其罪之

輕重。改罰銀為罰俸。自一月遞增至一年。

以故靖南王耿繼茂子和碩額駙耿精忠襲爵。

以羅森為四川巡撫。

秋七月。國子祭酒查祿請令學臣。選取生員。文行兼優者。送入太學。更請鄉

試。各取副榜。送監肄業。下部議行。

八月。停止鹽差御史巡歷地方。從左都御史明珠請也。

九月。雲南貴州總督甘文焜。丁母憂。命在任守制。

帝奉太皇太后皇太后至盛京謁陵。謁福陵昭陵。並遣王貝子等詣永陵

致祭。遣官祭諸王暨功臣墓。

冬十月。召寧古塔將軍巴海。問寧古塔及瓦爾喀胡爾喀人民風俗。帝召

問巴海並諭曰瓦爾喀胡爾喀人皆暴戾奸詭爾其善布教化以副朕綏遠至意

十一月帝奉太皇太后皇太后還京師

以張鳳儀爲山東巡撫

平南王尙可喜以疾奏請其子之信回粵暫管軍務從之

復設貴州平大黔威守道一駐大定府

募夫大挑淮揚裏河從河道總督王光裕奏也

十二月改貴州省龍里清平平越普定都勻五衛俱爲縣各設知縣典史一

以安莊衛歸併鎮寧州今爲縣屬貴西道黃平所歸併黃平州今爲縣屬鎮遠道新城所歸併普

安州今爲縣屬貴西道裁其守備等官從巡撫曹申吉奏也

罷民間養馬及用馬駕車之禁

〔壬子〕十一月春正月諭吏部嗣後丁憂官員督撫母得題留悉令離任守

制帝恐貪戀職任者多方營求有乖孝道故有是諭

厄魯特噶爾丹台吉請遣使進貢允之理藩院議覆厄魯特噶爾丹台吉

奏伊兄僧尼一作格台吉在時曾遣使進貢今請亦准照常遣使進貢從之

喀爾喀以西、天山以北、本厄魯特蒙古地也。其地故元代牧場，分駝馬牛羊四部，稱四衛拉特。復言四大部，元衰，猛可帖木兒據其地，明時謂之瓦剌。正統中，瓦剌極盛，其汗也先死，瓦剌中衰。譯分四部，居烏魯木齊附近者，曰和碩特，居伊犁者，曰準噶爾，居厄爾齊斯河流域者，曰杜爾伯特，居塔爾巴哈台附近者，曰土爾扈特。總謂之厄魯特蒙古。康熙初，準噶爾部長巴圖爾渾台吉死，子僧格嗣，其異母兄二人爭屬產，與僧格隙，刎殺之。時僧格同母弟噶爾丹，方爲刺麻，在西藏，歸而靖亂，戮逐諸兄，自立爲準噶爾汗，乃遣使請通好於清。

帝奉太皇太后往赤城湯泉。太皇太后因疾往赤城湯泉，帝侍行。

二月癸巳，帝還京，戊戌復詣赤城。

三月，封靖南王耿精忠所尙和碩郡主爲靖南王妃。

以徐化成爲湖廣巡撫。

帝奉太皇太后還京。

夏四月，裁江南海門縣歸通州管轄。

以鄂善爲山陝總督。原任總督羅多以前任河道總督時隄工冒銷錢糧

降調。

召原任大學士衛周祚來京，令入閣辦事。

以阿席熙爲陝西巡撫。

命侍衛吳丹、學士郭廷祚閱視河工，繪圖進呈。

五月，命兵部詳加點閱兵器。

六月更正賦役全書丁口數 戶部奏浙江所徵婦女小口鈔銀改爲食鹽課銀直隸流寓人丁山西久流人丁均改爲實在人丁幼丁改爲新編人丁應將賦役全書更正遵行從之

裁山西太原副將改設總兵官一

命大學士圖海等同法司清理刑獄

命工部行知河道總督漕運總督會同往視河工詳確議奏 侍衛吳丹學

士郭廷祚回京繪圖呈覽帝觀黃河自宿遷以至清河皆爲緊要雖有遙

隄一層恐未足捍蔽水勢欲于遙隄之外再作遙隄命工部行知河道漕

運二督會同往視察隄果否有益並所需錢糧逐一詳確議奏

以衛周祚爲保和殿大學士兼戶部尙書

秋七月授都統何進忠等一百二十七員世職有差 以敘征緬甸及雲南

貴州功也

閏七月除免加徵米麥 戶部議准給事中趙之符奏查順治十六年出征

湖南時平西王並經略巡撫等會議因糧米不敷以四斛作一石徵收今

地方已定此加徵兩斛米麥應于康熙十二年爲始除免從之

命陝西富平蒲城二縣糧米永行改折

八月治楊燦南罪。南懷仁奏參奸民楊燦南捏造真曆言一書譏刺欽天

監曆據楊燦南稱欽天監曆開載今年立春立秋閏月俱錯命大學士圖海等及九卿科道等官會同測驗尋以楊燦南不諳飛灰候氣之法覆奏命將楊燦南交刑部治罪

帝奉太皇太后至遵化縣湯泉

以故義王孫可望已襲替二次減等授爲慕義公。御史孟熊飛奏孫可望

爲李定國所敗窮蹙乞降我國家格外殊恩授以義王顯爵及伊身死已襲替二次今孫徵淳故若令再襲原爵則後此世世冒濫無已况定制從無投誠官員世襲罔替之例請停其襲爵或減等降封議政王大臣等議降爲義公得旨公銜止加一義字不合著再議尋議應稱爲慕義公從之

九月蠲江西廬陵吉水上高寧州

今江西修水縣

四州縣暨南昌九江衛南昌九江衛通賦並敕

巡撫速行招墾。江西廬陵等四州縣暨南昌九江衛頻年荒旱災疫流行

荒蕪田地五千四百餘頃命戶部蠲其逋賦仍敕巡撫速行招墾

冬十月帝奉太皇太后還京

以范承謨爲福建總督

停長蘆兩淮兩浙河東巡鹽御史差
鹽法事務歸併巡撫管理

以田逢吉爲浙江巡撫

十一月發帑賑浙江杭嘉湖紹四府

十二月裕親王福全莊親王博果鐸惠郡王博翁果諾溫郡王孟峨奏辭議政允之

康親王傑書安親王岳樂順承郡王勒爾錦貝勒察尼董額尙善奏辭議政不允

〔癸丑〕十二年春正月予故致仕內祕書院大學士馮銓祭葬諡文敏銓在前明附魏忠賢與東林爲難士論薄之

二月削解任湖廣總督張長庚太子少保銜以任偏沅巡撫時捏報墾荒故也

貴州巡撫曹申吉請以貴陽等七府錢糧各歸附郭之知縣管理從之戶部議准貴州巡撫曹申吉奏設官分職上下相維天下之通義獨黔省知府知縣各有親轄地方分徵錢糧並無經徵督徵之異非所以定經制而

專責成也。請將貴陽安順平越都勻鎮遠思南銅仁七府知府經營之地
方錢糧各歸附郭之知縣管理。其知府止司督徵之責。庶規制畫一。永遠
可行從之。

諭刑部直隸各省監候秋決人犯。于冬至以後部文咨到者。留于次年秋審
彙奏題報。永著爲例。

平南王尙可喜請撤藩歸老。許之。尙可喜年已七十。以兵事屬其子之信。
之信橫虐。可喜受其制。不得已用其客金光之計。請撤藩歸遼東。冀見帝
自陳部議。遂令盡撤藩兵回籍。

中和殿大學士巴泰以老病乞休。命原官致仕。

夏四月。命將滿語照漢文字彙集成一書。諭傅達禮滿漢文義照字翻譯。
可通用者甚多。後生子弟。漸致差謬。爾任翰林掌院。可將滿語照漢文字
彙發明某字應如何用。某字當某處用。集成一書。使有益于後學。不必太
急。宜詳慎爲之。務期永遠可傳。方爲善也。

安南國都統使莫元清請再敕諭黎維禧。退回保樂等地。不許。莫元清前
被黎維禧所逼。朝廷曾遣使敕諭黎維禧。退回高平等四州地方。至是莫

元清奏尙有保樂七源二州崑崙金馬等十二總社未還請再敕諭黎維禧全歸侵地議政王大臣等以莫元清來投時止言黎維禧攻取高平並未稱有保樂七源二州結案已久應無庸議從之

封暹羅國森烈拍臘照古龍拍臘馬嘑陸坤司由提呀苦埃爲暹羅國王

五月考察直隸各省督撫浙江總督劉兆麒江西江南總督麻勒吉湖廣巡撫徐化成原任山東巡撫丁憂劉芳躅俱降二級調外用

六月以張朝珍爲湖廣巡撫

以李之芳字郡國山東武定人爲浙江總督

以阿席熙爲兩江總督

命禁止八旗包衣佐領下奴僕隨主殉葬

秋七月平西王吳三桂疏請撤藩三桂奏臣下官兵家口于康熙元年遷

移至康熙三年遷完雖家口到滇九載而臣身在巖疆已十六年今聞平

南王尙可喜已准撤藩仰恃鴻慈請撤安插得旨著議政王大臣等會同

戶兵二部議奏

靖南王耿精忠疏請撤藩精忠奏臣襲爵二載心戀帝闕近見平南王尙

可喜乞歸一疏已奉俞旨仰懇皇仁撤回安插得旨王下官兵家口作何
搬移安插著議政王大臣會同戶兵二部議奏

八月差禮部左侍郎折爾肯學士傅達禮往雲南戶部尚書梁清標往廣東
吏部右侍郎陳一炳往福建經理各藩撤兵起行事宜

命戶部侍郎達都會同盛京戶部侍郎奉天府尹察看安插三藩地方

九月調鄂善為雲南總督以雲南地屬遠疆撤藩後控制需人專設總督

一員添設提督一員

冬十月河決淮揚清水潭石隄淮揚地方清水潭石隄復決黃淮水勢彌

漫高寶等一十八州縣衛所被災勅總漕巡撫動庫銀四萬兩買米委官

各處賑濟

十一月以趙祥星為山東巡撫

命學士熊賜履編修葉方藹崑山人張英桐城人修撰韓菼長洲人等各撰

太極圖論一篇進覽諭侍讀學士喇沙里朕在宮中博觀典籍見宋儒周

敦頤太極圖義理精奧實前賢所未發朕嘗極意探索究其指歸可命學

士熊賜履編修葉方藹張英修撰韓菼等各撰太極圖論一篇朕親覽焉